

FO'I SHINISHI DI OLVIDO

Pa Ernesto E. Rosenstand

ORANJESTAD (APA) Aña ta kabando i semper esaki ta e temporada pa tira un bista atras o pa buska manera di pensa riba temponan pasá, esunnan ku semper nos ta haya hopi mihó cu esunnan di awendia.

Ma semper nos ta lubidá ku kada tempo tin su karisma, su baló y maske nos kler nos no por kompará. Ma maske nos tende esaki hopi mes tog nostalgia ta lanta sentimentonan grato pa kos-

nan ku a pasa! I un di e kasonan aki ta Nos Kaya Grandi. Si nos kana awendia dor di Nassaustraat nos ta keda asombrá pa su bunitesa. Ela bira un kaya ku por kompeti ku kualkier otro kaya di statnan grandi. Ma ku tur su bunitesa, el a perde su sabor. Nassaustraat di antes tabata en realidat "nos kaya grandi". Atardi poko promé ku seis or bati e ta yena su yonkumannan ku ta bai warda e galeins sali for di pakus. E temponan ei no tabatin kuenta di sali for di pakus, drenta bo outo bai! E temponan ei - mi ta skibiendo di kabamento di añanan kua-
renta, kuminsamento di añanan sinkuental!

Atardesito tur hende tabata "a la expectativa" pa seis or bati. Ken no ta korda e kantika: "seis or bati pa mi bai"! Anto ora e galeinsnan tabata sali .. tabatin sabor, bida den nos kaya grandi! Pasobra kaya grandi tabata di nos! I loke mi ta bai konta boso ta kos di hopi tempo pasá, tempo ku ainda kaya di Nassau tabatin sabor di un kaya di stat di provinsial! Den e kaya aki tur hende tabata konosé tur hende! Ma esaki a bai! Awe praktikamente nos ta un numero ... un individuo ku ta kompletamente profundisá den su problema. I esaki ta hasi ku awendia Kaya Grandi tin e pretenshon di ta: un kaya di kualkier pais grandi! Ma esei no tabata asina!

Temponan aya tur kos importante mester pasa dor di Nassaustraat pa e por haya e

importansia ku e tabata meresé! Si un pareha kasa 'su deseo di mas grandi ta baha pasa pita den kaya i sigui pa e lugá unda ku nan lo bai fiesta. Mira promé Kaya Grandi i despues fiesta! Si timnan sali kampeon den kua deporte ku ta ta dor di Nassaustraat e mester pasa pa demostrá nan alegrí! I e temponan ei ora nos drenta Kaya Grandi di p'abao anto nos tabata haya na nos man robes un tienda di komestible: La Cosechal! Aki dominicanonan tabata bende! La Cosecha e temponan ei pa e muchanan di Socotoro i Companashi tabatin un importansia enorme! tras di e negoshi aki nos tabata skonde pa spanta tur hende ku tabata sali for di sine e temponan ei. E tabatin un renbak ku su ariba tabata di zink. Anto ora bo kuminsá sapateá o batié anto den silencio di anochi tur esaki tabata produci un desorden ku fierno mes tabata spanta! I poko mas p'ariba tabatin e negoshi di Aruba Trading. E tabata yama bo atenshon pa e dos portanan grandi di hero ku ora nan baha nan tabata invita bo ... o pa bo kana tras di Johnny Walker o pa bo dal un Schlitz. Un di e serbesnan ku tabata bende mas hopi na nos isla e temponan ei! I na e tienda aki nan tabata bende diferente kos. Kiko Esei si ya mi no ta korda! Loke si mi ta korda ta ku nan tabatin lugá di bende eiskrim. I tur diasabra mainta o dianan di fakansi esei tabata e lugá di topa di hubentut! Aki bo ta-

bata haya e sundae i e banana split mas dushi di e isla! I nan no tabata di e kara ei! Ma lo mas importante di e bendemento di eiskrim aki tabata ku banda di unda ku bo tabata sinta, bo tabatin un reki yen di "pocket-books" ku nan tabata bende. Bon si nan tabata bende: esei tabata otro pregunta! Esei tabata nos libreria! Nos tabata kumpra nos eiskrim i ora nos ripará ku ningun hende ta mira nos chuplún un di nan ta desaparesé den bo kamisa! No tabatin kuenta di hinka kamisa den karson! Kamisa afó ta skonde hopi mas mihó! Si bo ripará bon ora nos drenta nos no tabata di e gordo ei ma despues di eiskrim nos tabata bira un tiki gordol! I kana un poko delikadol! E buki aki bo no tabata picha, ma bo tabata fia! Ningun otro kaminda bo por a haya pockets asina kumpra. Nan tabata bon i mei! Ora ku bo kaba ku nan bo tabata hiba nan bek, bon pa ta ser

franko, esunnan menos bon! E bonnan tabata keda sirkulá di un man pa otro te ku nan blachi tabata bira marón. Anto despues di tempo nos tabata komentá ku no tabatin mas buki interesante. I esei tabata un indikashon pa e empleado tuma nota i perkura pa lo mas pronto posibel renobá e stock! Esunnan ku nos tabata lesa mas hopi tabata esunnan ku tabata trata temanan Western. I meskos ku e pelikulanen basá riba e temátika aki e pelikula o e buki tabata bon si tin hopi peleá den dje. Nos tabata konta tur e peleanan.

For di dia ku Aruba Trading a stop ku e bendemento aki di pockets, Aruba no konosé mas e kombinashon libreria-refreskeria! I for di dia ku a kuminsá modernisá Nassaustraat su sabor a kuminsá bai i maske ku bo no ta kere, ma esei ta di lamentá! Yam'é kon ku bo kler yam'é!

